

民國四年九月出版

前
明
十三陵始末記

每本附陵圖壹頁



3 1799 81/1 1

前明十三陵始末圖說

明成祖長陵在昌平縣城北二十里天壽山中峯之前

明太祖開國皇帝姓朱名元璋字國瑞江南鳳陽縣人以布衣起兵拜劉伯溫爲軍師征戰十八載滅元克成一統定鼎於金陵改國大明建元洪武在位三十一年卜陵江寧皇子甚多分封外方長子卒太祖崩葬於江寧其孫建文即帝位初太祖第四子朱棣封燕王委鎮燕京北平府燕王乃有作爲之君至此國富兵強人民安謐一日燕王夢生母甕后徧身焦黑歷言被害之故並告以復仇嗣位等語言訖不見燕王驚醒遂集文武計議王曰吾欲領兵赴金奔喪藉探消息遂擇日統兵至金屯城下探知生母果被害燕王怒進城入宮欲待問故馬后自縊彼時建文在位四年以帝位讓燕王己遂奔往他方隱於洪恩寺削髮爲僧南京平文武歸順燕王因嗣帝位改爲永

樂謚爲成祖文皇帝封官安民起駕回燕大封功臣懋賞士卒改燕京爲北京改北平府爲順天府修築城池大其規模遂移建帝都於此焉因擬探選陵地巡幸北至永安城（今昌平縣）駐蹕聞城北龍母莊有賢士姚光孝者博學詩書精通地理時有大臣剛內等隨駕並至龍母莊正值莊內劉某娶婦下轎帝告主人曰是日乃凶煞當執五鬼在位大凶因問是日何人所擇主人答以姚某帝召問之光孝曰此日有紫微星相遇下轎時有龍虎冲去凶煞無相礙矣帝曰先生之才吾不及也既有此才何不出仕光孝曰無由而進帝曰我即大明天子永樂也光孝跪伏帝曰勿驚朕今欲探陵地封先生爲尋陵侯着先生同往光孝叩頭遂駐蹕於劉某焉次早君臣尋至湯山及潭柘寺等處看其山象稍好水法不利復返駕至龍母莊河北天壽山看其前後左右遠近由起祖至結穴中有太祖少祖穿帳起伏過峽束氣等處

並有日月五星祿馬貴人貴器迎送層層護衛又觀其四維八千羅城周密
聚氣藏風山環水抱龍虎龜蛇諸般靈瑞無所不有此誠王氣所鍾天造地
設大地也光孝奏明帝審顧喜問曰生旺若此葬後可綿陰幾世光孝對曰
萬子崇孫葬於河南之地即龍母莊之河南也帝又問曰祖陵修在何處光
孝對曰此天壽山爲少祖是龍氣過峽之處天壽山中峰之前黃土山下乃
龍氣結穴之地即爲穴星可修於此帝復審視又與從臣王賢廖均卿共卜
之吉由是擇定點穴之處並周圍山圈地譜八十餘里皆命爲此中地界畢
起蹕回朝至永樂七年五月乃於昌平縣城北二十里天壽山中峯之前黃
土山下修陵名長陵坐癸山丁向命尋陵侯姚光孝武義伯王通督工在龍
母莊河北立工部廠備運工料先從德勝口東北乾亥方源頭活水處修龍
王廟一座即於此處修水池九座龍口九間名九龍池其水甚大從向左巽

絕位消去又爲水陸行船之處設官防守又於東方數里外修長城壩口水
關名曰東山口又於西方數里外修長城名曰西山口又於小紅門北修水
關二以防水溢又於向後北方各山口俱修關口名曰灰石嶺賢莊口錐石
口舊有德山口復就其地新立關口以上凡曰關曰口以及水旱近陵要區
俱設官弁防守以備不虞德勝口內有名溝崖者崖上修碑亭一座又修麻
大庵一座崖下修麻姑廟一座內修大殿配殿數間再上又修老君廟一座
內修大殿十三間兩旁修捨茶棚數間上諸處皆重巒疊翠水秀山清林木
口岸殿宇四面環繞益見近陵之地之壯麗不孤也 自縣西門北六里有
白石牌坊一座五架其上椀檁檁斗拱柱脚排山插飛無木俱以白石爲之
鐫刻工極精巧旁有官房三十二間今牌坊堅立而房傾圯少北有石橋三
空又二里至大紅門門三道東西二角門門外東西各有碑刻曰官員人等

至此下馬入門里許有碑亭重簷四出陞中有穹碑高三丈龍頭龜趺題曰大明長陵神功聖德碑仁宗皇帝御製文也亭外四隅有汗白玉石柱四俱刻交龍環之其東有行宮今亡又北可二里爲櫺星門門三道俗名龍鳳門門之南有石人十二四勳臣四文臣四武臣俱高丈許石獸二十四四馬四麒麟四象四橐駝四獬豸四獅子各二立二蹲近者立遠者蹲石柱二刻雲氣並夾侍神路之旁迤邐而南以接乎碑亭碑文後書洪熙元年四月十七日小子嗣皇帝某謹述蓋文成而碑未立宣德十年四月辛酉修長陵獻陵始置石人石獸等於御道東西十月己酉建長陵神功聖德碑是時仁孝皇后之葬二十有三年成祖文皇帝之葬亦十有一年矣然而始立者重民力也櫺星門北里許名武坡坡西少南有舊行宮今存土垣一週坡北一里大水橫之（係九龍池流來之水）有石橋五空又北二百步有大石橋七空大

石橋東北里許有新行宮有感思殿今亡宮東南即所立之工部廠及內監公署今並亡只有舊基大石橋正北二里有石橋五空又二里至長陵殿門神道嘉靖十五年世宗謁陵始命以石甃今稍殘缺自大紅門內至殿門神道兩旁松柏榆槐菓木等樹數十萬株今翦伐盡矣 殿門三道東西二角門門內東神廚五間西神庫五間廚前有碑亭一座南向內有碑龍頭龜跌無字重門三道榜曰稜恩門東西二角門門內有神帛爐東西各一其上爲享殿榜曰稜恩殿九間重簷自柱頂至椽枋高三丈面寬十丈內連五層共殿內四十五間殿內黃木明柱四十餘根每柱高三丈周徑一丈一尺中四柱飾以金蓮餘皆髹漆金磚墁地中間楠木大龕內供皇帝牌龕刻雙龍環繞之形與牌位之字皆以金填之外階三道中一道爲神路中平外城其平亦刻雙龍形東西二道皆城刻雲氣形前後階同殿座四圍有汗白玉石欄

三層俱刻花鳥形兩旁皆有級執事所上也兩廡各十五間殿後爲門三道又進爲白石坊一座又進爲石臺其上爐一花瓶燭臺各二皆白石中腰有縫內有水至今四季不乾又進爲寶城城下有甕甕中甬道內爲黃琉璃屏一座正中石門緊閉門內爲隧道門外兩旁有級分東西上折而南是爲明樓重簷四出階前俯享殿後接寶城城上有榜曰長陵中有大碑一上篆書曰大明下隸書曰威廟文皇帝之陵字大徑尺亦以金填之碑用朱漆欄壽雲氣碑頭交龍方趺寶城周圍二里城內寶頂土山上皆松柏下有水溝內有金井石床(在石門內隧道中)即金棺所在自殿門左右繚以周垣屬之寶城殿門外絕字位有宰殺亭一座垣及寶城之內外植樹五百株今仍叢茂陵外正東方修長陵監一城門西南開二門內四圍羅牆中修一院爲守陵內監所居夾道南北各修二院各開二門東西並修三院開三門爲守陵

大小官弁所居監外正南方數里外立長陵園一村安民授田爲守望相助之義工竣封姚光孝爲護國軍師永樂在位二十三年壽至六十五歲而崩葬於長陵仁孝文皇后徐氏先已從葬

明仁宗獻陵在天壽山西峯下東南距長陵一里

成祖崩太子朱高熾即帝位改洪熙是爲仁宗昭皇帝即位後於天壽山西峯下黃土嶺前修陵名獻陵坐癸山丁向距長陵西少北一里自北五空橋北三十餘步分西爲獻陵神路至殿門可二里有碑亭一座重簷四出階內有碑龍頭龜趺無字亭南有小橋一空門三道榜曰稜恩門無角門殿五間單簷柱皆朱漆直椽皆三道其平刻雲花石欄一層東西有級兩廡各五間餘制如長陵殿有後門爲短簷屬之垣垣有門後有土山曰玉案山故闢神路於玉案山之右有小橋前數步又一小橋跨溝水溝水自陵東來過橋下

會於北五空橋山後橋三道皆一空又進爲門三道並如長陵而高廣殺之甬道平寶城小冢半填榜曰獻陵碑曰大明仁宗昭皇帝之陵餘並如長陵山之前門及殿山之後門及寶城各爲一周垣舊有樹今亡十二陵制獻陵最樸景陵次之洪熙元年五月辛巳上疾大漸遺詔有曰朕臨御日淺恩澤未洽於民不忍重勞山陵制度務從儉約是日上崩皇太子即皇帝位及營仁宗皇帝山陵上諭尙書蹇義夏原吉等曰國家以四海之富葬其親豈惜勞費然古之帝王皆從儉制孝子思保其親之體魄於久遠者亦不欲厚葬秦漢之事足爲明鑒况皇考遺詔天下所共知今建山陵予以爲宜遵先志卿等之意如何義等對曰聖見高遠發於孝思誠萬世之利於是命成山侯王通工部尙書黃福總其事其制度皆上所規畫也陵外西南方二里修獻陵監一城門東開監外正南方數里外立獻陵園一村安民授田其監與園

之規制亦稍遜於長陵工竣仁宗昭皇帝葬於獻陵後誠孝昭皇后張氏從葬

明宣宗景陵在天壽山東峯下南距長陵一里半

仁宗崩太子朱瞻即帝位改宣德是爲宣宗章皇帝即位後於天壽山東峯下名黑山嶺又名松竹山修陵名景陵坐艮山坤向距長陵東少北一里半自北五空橋南數步分東爲景陵神路至殿門三里碑亭門廡如獻陵殿五間重簷階三道其平刻龍形殿座石欄一層殿有後門不屬垣殿後門三道並如獻陵明樓下甬道平寶城長而狹榜曰景陵碑曰大明宣宗章皇帝之陵周垣如長陵寶頂上及寶城前有樹四十株寶頂下石門隧道金井石床以及牆內應設殉葬等物均訪長陵稍遜陵外正南方修景陵監一城門西開其內規制與長陵監同監之正南方數里外立景陵園一村安民授田宣

德在位十年壽至三十七歲而崩葬於景陵後孝恭章皇后孫氏從葬

明英宗裕陵在石門山東距獻陵三里

宣宗崩太子朱祁鎮即帝位改正統是爲英宗睿皇帝正統十四年有司禮太監王振用事擅作威福英宗北狩土木日久未返英宗弟景泰攝政是爲代宗攝位七年英宗返景泰讓位後景泰崩葬於西山東四墓正統復位又改天順於石門山下修陵名裕陵坐癸山丁向距獻陵西三里自獻陵碑亭前分西爲裕陵神路有小石橋碑亭北有橋三道皆一空平刻雲花殿無後門榜曰裕陵碑曰大明英宗睿皇帝之陵餘並如景陵寶城及寶頂下石門內外等處俱如獻陵垣內及冢上樹一百六七十株陵外正南方修裕陵監一城門東開監之東南方數里外立裕陵園一村安民授田天順在位八年壽至三十八歲而崩葬於裕陵後孝莊睿皇后錢氏從葬

明憲宗茂陵在聚寶山東少南距裕陵里許

英宗崩太子朱見深即帝位改成化是爲憲宗純皇帝即位後於聚寶山下修陵名茂陵坐癸山丁向距裕陵西北一里自裕陵碑亭前分西爲茂陵神路路有石橋一空制如裕陵殿之階欄及明樓寶城石門內外亦俱如景陵規制榜曰茂陵碑曰大明憲宗純皇帝之陵垣內外及寶頂上有樹千餘株十二陵惟茂陵獨完他陵或僅存御榻茂陵則簷簾之屬猶有存者陵外西南方半里修茂陵監一城門東開監之東南方數里外立茂陵園一村安民授田成化在位二十三年壽至四十歲而崩葬於茂陵後孝貞純皇后王氏從葬

明孝宗泰陵在筆架山東南距茂陵一里

憲宗崩太子朱祐禋即帝位改宏治是爲孝宗敬皇帝即位後於史家山又

名筆架山下修陵名泰陵坐壬山內向距茂陵西少北二里自茂陵碑亭前分西爲泰陵神路路有石橋五空賢莊灰嶺二水逕焉碑亭北有橋三道皆一空其寶城明樓殿宇階欄石門內外制如茂陵榜曰泰陵碑曰大明孝宗敬皇帝之陵垣內寶城內及冢上樹百餘株殿上存御座御案御榻各一承塵皆五色花板多殘缺而茂陵泰陵完焉陵外西南方半里許修泰陵監一城門東開監之正南方數里外立泰陵園一村安民授田宏治在位十八年壽至三十六歲而崩葬於泰陵後孝康敬皇后張氏從葬

明武宗康陵在金嶺山東北距泰陵二里

孝宗崩太子朱厚鍊即帝位改正德是爲武宗毅皇帝即位後於金嶺山又名八寶蓮花山之下修陵名康陵坐辛山乙向距泰陵西南二里自泰陵橋下分西南爲康陵神路山勢至此折而南故康陵東向路有碑亭石橋五空

錐石口水逕焉今圯又前有石橋三空享殿寶城石門等處制如泰陵榜曰康陵碑曰大明武宗毅皇帝之陵後明樓爲賊所焚垣內外樹二三百株陵外東南方半里修康陵監一城門北開監之西南方數里外立康陵園一村安民授田正德在位十六年壽至四十一歲而崩葬於康陵後孝敬毅皇后夏氏從葬

明世宗永陵在十八道嶺西距長陵二里

武宗崩無子舉皇族內武宗之堂弟憲宗之庶孫朱厚總即帝位改嘉靖是爲世宗肅皇帝即位後於十八道嶺嘉靖十五年改名陽翠嶺之下修陵名永陵坐艮山坤向距長陵東南二里自七空橋北百餘步分東爲永陵神路長三里有石橋一空碑亭一座如獻陵而崇鉅過之碑亭南有石橋三道皆一空門三道門內東神廚西神庫各五間重門三道東西二小角門又進復

有重門三道飾以石欄累級而上方至中墀殿七間兩廡各九間其平階刻左龍右鳳石欄二層皆刻雲花餘悉如長陵殿後有門兩旁有垣垣各有門明樓無甬道東西爲白石門曲折而上樓之三面皆爲城堞榜曰永陵碑曰大明世宗肅皇帝之陵享殿明樓皆以文石爲砌壯麗精緻孝長二陵不及也寶城前東西垣各爲一門門外爲東西長街而設重垣於外垣凡三周皆屬之寶城其規制特大云舊有樹今亡陵外正南方修永陵盦一城門西開盦之正南方數里外立永陵園一村安民授田嘉靖在位四十五年壽至六十歲而崩葬於永陵後孝潔肅皇后陳氏從葬

明穆宗昭陵在大谷山東北距長陵四里

世宗崩太子朱載堦即帝位改隆慶是爲穆宗莊皇帝即位後於大谷山下修陵名昭陵坐乾山巽向距長陵西南四里自七空橋北二百步分西爲昭

陵神路長四里路有石橋五空德勝口水逕焉又西有石橋一空今圯陵東南向碑亭西北有橋三道皆一空餘如享殿寶城石門俱如康陵榜曰昭陵碑曰大明穆宗莊皇帝之陵後明樓爲賊所焚樹亡陵外正南方半里修昭陵監一城門南開監之東南方數里外立昭陵園一村安民授田隆慶在位六年壽至三十六歲而崩葬於昭陵後孝懿莊皇后李氏從葬

明神宗定陵在大峪山東距昭陵一里

穆宗崩太子朱翊鈞即帝位改萬曆是爲神宗顯皇帝即位後於大峪山下修陵名定陵坐戌山辰向距昭陵北一里自昭陵五空橋東二百步分北爲定陵神路長三里路有石橋三空陵東向碑亭東有橋三道皆一空制如永陵其不同者門內神廚庫各三間兩廡各七間三重門旁各有牆牆有門不升降中門之級享殿後有石欄一層而寶城從左右上榜曰定陵碑曰大明

神宗顯皇帝之陵後寶城及殿廡門俱焚樹亡陵外西南方修定陵監一城門北開監之東南方數里外立定陵園一村安民授田萬歷在位四十八年壽至五十五歲而崩葬於定陵後孝端顯皇后王氏從葬

明光宗慶陵在天壽山西峯右東南距獻陵一里

神宗崩太子朱常治即帝位改泰昌是爲光宗貞皇帝即位後於天壽山西峯右黃土嶺下修陵名慶陵坐癸山丁向又云此陵原景泰所建俗謂景泰窪是也距獻陵西少北一里自裕陵神路小石橋下分東北爲慶陵神路長二十餘步有橋一道一空制如獻陵平刻龍鳳殿柱飾以金蓮殿無後門殿後繚以垣門一道門北有橋三道皆一空其水自殿西下殿門西又有一小橋爲行者所繚殿北過橋有土崗自東而來至神路而止岡後周垣門三道如獻陵寶城東西直上空中復爲甬道而入榜曰慶陵碑曰大明光宗貞皇

帝之陵殿門前及垣內外寶頂上共樹五百株陵外西南方半里許修慶陵監一城門東開監之正南方數里外立慶陵園一村安民授田泰昌在位數月壽至三十九歲而崩葬於慶陵後孝元貞皇后郭氏從葬

明熹宗德陵在金鎖山檀子峪西南距永陵一里

光宗崩太子朱由校即帝位改天啓是爲熹宗愍皇帝即位後於檀子谷下修陵名德陵坐乙山辛向距永陵東北一里自永陵碑亭前分北爲德陵神路碑亭前有橋三道皆一空制如景陵平刻龍鳳殿柱飾以金蓮殿無後門榜曰德陵碑曰大明熹宗愍皇帝之陵樹亡凡殿樓門亭俱黃瓦陵外西南方修德陵監一城門北開監之西南方數里外立德陵園一村安民授田天啓在位七年壽至二十三歲而崩葬於德陵無后從葬

明莊烈帝思陵在錦屏山昭陵西距西山口一里

熹宗崩無太子舉熹宗弟朱由檢即帝位改崇禎是爲懷宗莊烈愍皇帝在位十七年未及修陵鹿馬山即錦屏山有田貴妃墓距西山口一里崇禎壬午妃薨葬此遣工部左侍郎陳必謙等營建未畢流賊李自成犯闕都城失守彼時衆臣逃散惟太監王承恩隨帝赴難周皇后科勢已孤先自刎帝乃縊於煤山名萬歲山王承恩亦同時死帝側賊以帝后梓宮至昌平士民謀欲率錢募夫葬於田妃墓內聊斬蓬蒿以封之惟時昌平州（今已改縣）吏目趙一桂因呈開壙捐葬事云恭照明陵當昌平州天壽山卑職於崇禎十七年正署州捕遭都城陷沒故主縊崩至三月二十五日順天府僞官李紙票爲開壙事仰昌平州官吏即動官銀僱夫速開田妃壙安葬崇禎先帝及周皇后梓宮四月初三日發引初四日下葬毋違時刻彼時州庫如洗監葬官禮部主事許作梅因葬主限迫亦再三躊躇趙一桂與好義之士孫繁祉

白紳劉汝朴王政行等十人共捐銅制老錢三百四十千僱夫啓閉初四日申時候崇禎靈到即停於祭棚趙一桂親領夫役入壙宮內即將田妃移於石床之右次將周后安於石床之左後請崇禎之棺居於正中田妃葬於無事之時棺槨俱備崇禎有棺無槨遂將田妃之槨移而用之三棺之前各設香案祭器畢將二座石門關閉當時掩土地平尙未立冢至初六日差人傳附近西山口地方撥夫百名各備掀掘筐擔昇土築完趙一桂與孫繁祉等亦捐貲五兩買甃修築周圍冢牆高五尺有奇名思陵坐子山午向此創葬於變亂之際規制狹隘無殿宇明樓寶城亦未修監立園陵外西側有御馬監遂將王承恩葬此即爲王承恩之墓至前清定鼎特遣工部復將崇禎陵寢修建享殿三間羣牆一週使前朝故主不致淪沒於荒郊君后猶享血食於後世復於陵外修思陵監一城監外立思陵園一村亦安民授田其規模

局勢稍遜於諸陵並修王承恩墓以昭死難之節思陵葬日仁和龔光祿佳育流寓昌平地宮例書某帝之陵合以石板奉安梓宮之前時倉卒不及龔石以犢代之鈐之以鐵乃光祿所書也光祿嘗語人曰壙始開入石門地甚溼其中衣被等物多黧黑被止一面是錦繡餘皆以布長明燈油僅二三寸缸底皆水其金銀器皆以鉛銅充之當時中官破冒良可憾也

諸后祔葬

孝烈皇后方氏祔葬永陵孝安皇后陳氏祔葬昭陵穆宗之繼后也孝肅皇后周氏祔葬裕陵憲宗母也孝穆皇后紀氏孝惠皇后邵氏祔葬茂陵孝宗母睿宗母也孝愔皇后杜氏祔葬永陵穆宗母也孝定皇后李氏祔葬昭陵神宗母也孝靖皇后王氏祔葬定陵光宗母也孝和皇后王氏孝純皇后劉氏祔葬慶陵熹宗母大行皇帝母也而熹廟懿安皇后張氏不知所終事莫

得而詳焉

諸貴妃墓

宮人從葬之令至英宗始除故長陵有東西二井東井在德陵東南饅頭山之南西向西井在定陵西北東向並重門門三道殿三間兩廡各三間綠瓦周垣會典言長陵十六妃從葬位號不具曰井者蓋不隧道而直下故謂之井或言越絕書有禹井井者法也禹葬以法度不煩人衆當日命名之意或有取於此與自英宗既止宮人從葬於是妃墓始名或在陵山之內或在他山其在陵山內者則自昭陵之左九龍池上南行二里許爲蘇山有萬貴妃之墓憲宗妃也訓如二井東向又南爲銀錢山有鄭貴妃暨二李劉周四妃之墓神宗妃也訓如二井南向今毀又南爲襖兒峪有四妃二太子墓中闕妃王妃左馬妃次左沖袁太子右楊妃次右莊敬太子世宗妃太子也又南

爲悼陵制如二井東南向孝潔皇后陳氏初謚悼靈葬此世宗崩遷永陵而其封兆尙存旁有沈文虛三妃之葬至今猶曰悼陵云又縣城東大道北有劉妃墓惠妃墓

明靳獻王墓滕懷王墓在縣城東十五里綿山（仁宗子也）

明東平王墓在縣城東北一百二十里被澤山

明王承恩墓在思陵西

思陵右爲司禮監太監王承恩墓以從死耐焉前清定鼎後順治十六年世祖章皇帝因祭明請陵並祭明愍皇帝陵側見其墓乃命從臣李燾爲之撰墓碑云

上北幸昌平致祭明陵念明崇禎帝勵精遭亂亡國非辜業爲建碑陵寢迨車駕蒞止瞻眺致敬爲感惻者久之顧見陵側有邱歸然爲明故司禮監秉

筆太監王承恩募蓋殉崇禎帝於萬歲山者也。因憫其忠義，隨命從臣麻勒吉酌酒於其前，復命從臣霽撰書其事，碑於墓道。在昔崇禎甲申之變，大盜燔亂海宇，土崩崇禎帝孤立於上，封疆大吏望風而靡在廷之臣，怡然罔覺。及賊薄都城，陷不旋踵，帝執國君死社稷之義，赴萬歲山上賓，惟承恩分屬親臣情深，戀主自經，帝側視死如歸，嗚呼！中官殉國，推爲千古一人，洵無愧矣。

明守備王政行墓在縣城西小營村外

初李自成破京師，帝后旣崩，以車一乘載出東門外，館以柳木，置道旁。時皆僞官，無以爲意。於是有人者痛哭，王君倡首相與出家財，得錢三百五十千，爲請於官，啓懷宗故妃田氏之墓，迎梓宮而合葬。凡畚鍤斥復之事，皆王君親爲，勞累君諱。政行號次泉世居昌平之福會里，祖泰父三省，皆業農，不

仕君生於萬歷戊戌二月卒於康熙甲辰三月即以其年四月葬於其里小營村之原其九人亦有世居昌平業商業農者惜其住趾原委今無考焉

前清世祖章皇帝祭明諸陵文 維順治十六年歲次己亥仲冬戊午朔十有

七日甲戌

皇帝致祭於明成祖皇帝仁宗皇帝宣宗皇帝英宗皇帝憲宗皇帝孝宗皇帝武宗皇帝世宗皇帝穆宗皇帝神宗皇帝光宗皇帝熹宗皇帝諸帝丕承鴻運撫有寰區莅政理民爲一代主朕巡幸畿輔道經昌平瞻陵寢之在茲景流風而興感特以牲帛醴齊庶品之儀用申祭享尙其歆格

前清世祖章皇帝祭明崇禎帝文 維順治十六年歲次己亥仲冬戊午朔十有七日甲戌

皇帝致祭於明莊烈愍皇帝曰維帝英姿莅政志切安民十有七年勵精靡

懈詎意寇亂國亡身殉社稷向使時際承平足稱令主祇以襲敝政之餘逢陽九之運雖才具有爲而命移莫挽朕恒思及憫惜良深今因巡幸畿輔道經昌平陵寢在焉顧瞻增感特以牲帛醴齊庶品之儀用申祭享尙其歆格

前清世祖章皇帝諭修明崇禎帝陵詔

朕維膺圖永祚統紹百王而創業宏模情殷勝國歷觀史冊興亡之迹考其治亂得失之由愈以政荒遂干天譴邦國既墮士民罔懷維有明莊烈愍皇帝實治理之究圖惜贊襄之莫逮以致寇氛犯闕宗廟爲墟追念喪師非因失德朕每念及此未嘗不惻焉心傷也頃者兩幸昌平周視明代陵隧躬親盥奠俯仰徘徊以彼諸陵規制咸壯麗相因獨愍帝之陵荒涼卑隘典物未昭原彼當年孜孜求治宵旰不遑祇以有君無臣薄海鼎沸汨乎國步傾危身殉社稷揆之正終之例豈同亡國之君朕於憑弔之餘撫往興悲不禁流

涕因欲繕治陵寢丹堊几楹慰靈爽於九京彰異數於奕禩乃核少府金錢
悉皆小民正供倘增工徒之費殊乖賦式之經然終不忍聽其闕畧用是布
告方州開導惻忱交相輸助聿新髣髴以肅松楸爾等溯厥源流夙沐前朝
之澤凡茲臣庶寧無故主之思矧愍帝之終異於往葉而勸忠之感當有同
心或列籍薦紳或齒登編戶恩沾累世德濺高曾勿以革故爲嫌致歎事亡
之誼各隨心力共佐經營在內所捐貯之工部各直省地方輸之有司彙解
工部獨慮經費浩繁紓以歲月計資罔缺工役乃興繚以周垣崇其寢殿奢
靡不尙雖少遜厥諸陵鳩庀獨新庶無曠乎儀制所在奉行毋滋擾害克成
斯舉式副朕心

前清世祖章皇帝御製明內監王承恩碑文

朕聞烈士殉名齋志而沒貞臣衛主捐軀以從自有明失馭寇陷都城懷宗

皇帝敦國君死社稷之義崩於石室時有司禮監秉筆太監王承恩者攀龍鬚而矢志甘雉經以從君陪縊於傍死而猶踞嗚呼若承恩者可謂事君有禮不忘其忠者矣夫人臣事主無二厥心爲其易者與爲其難者途徑若分理道則一人臣之懷二心者倖圖苟免甘心事讎乃在平日侈讀詩書高擁爵位之人無論生無以爲人死無以爲鬼對若人其亦何地置足耶朕殲厥巨憝用彰民彝旣禮葬懷宗皇帝於思陵因賜承恩塋域一區俾葬兆外以從厥志仍賜之香火田地豎之穹石使後世知艱危之際內員中乃尙有忠烈而死如承恩者

前清世宗憲皇帝 明十三陵祭文

國家善政覃敷鴻恩徧洽而殊禮更施於勝國優秩特加於後人廢絕之祀復興妥侑之靈有託隆規錫慶奕禩承休仰惟

聖祖仁皇帝至德同天深仁溥地萬畿之暇睦念前猷謂有明太祖創業維勤宅心克廣經文緯武英畧蓋於九州酌古準今制作隆於一代逮於季世雖無暴虐之君爰至末年每值災荒之運因賊徒之蠶起致鼎祚之潛移我朝戡定寰區屢加恩澤禁樵蘇而設護詣陵寢以薦馨然而胄裔浸微春秋闕祀皇情感惻每眷遺徽宸翰留貽將行曠典朕上承

先志命考宗支以明太廟第十三子代簡王之裔恩賜阿思哈尼哈番朱廷文之嫡孫朱之珽授爲一等侯列五等之班備三恪之典俾傳世爵以奉蒸嘗載煥儀章用申祭告於戲崇階厚祿我國家特沛夫殊恩濡露降霜帝子孫永承其禋祀尙其欵格監此榮施

前清世宗憲皇帝防護明陵諭

前明諸帝不無功德於民其敬禮崇奉之心即異代亦不當弛懈况陵寢所

在乃神所憑依尤宜加意防衛以申仰止之忱朕於雍正元年恩詔內即以修葺歷代帝王陵寢通行申飭亦恐有司相沿積習視爲泛常嗣後著於本年年底令該地方官將防護無虞之處結報督撫造冊轉報工部彙齊奏聞倘報不實將該督撫及地方官分別議處明太祖陵在江寧昔我

聖祖仁皇帝屢次南巡皆親臨祭奠禮數加隆著江南總督轉飭有司加意防護其明代十二陵之在昌平者自本朝以來即設立內監陵戶給以地畝令其虔修禮祀禁止樵採並差人員時加巡視務令地境之內清淨整齊倘陵戶或有不敷著該督酌議加增此南北明陵二處亦著該督撫於每年歲底冊報工部彙奏（雍正二年）

前清高宗純皇帝再重修明陵諭

直隸昌平州（今改縣）爲前明陵寢之地本朝定鼎後我

世祖章皇帝即

命以帝禮改葬思陵並

敕工部修葺諸陵

親臨奠醑並禁止樵採添設陵戶我

皇祖聖祖仁皇帝亦曾

親臨致奠並飭地方官加意防護所以加禮前代者最爲優渥朕此次行幸
湯泉取道昌平躬詣長陵致奠見諸陵寢明樓享殿多有損壞神牌龕案亦
遺失無存爲之慨然弗忍視蓋由明代中葉以後國事廢弛全不以祖宗爲
念於陵寢並未修葺至末年復經流寇擾亂亦無人守衛以致日就傾圮若
其後代之君果能歲加繕治整齊完固逮今不過百有餘年亦何至頽剝若
此又諸陵前雖建有碑座均未鐫泐未知彼時是何意見今親臨奠醑周覽

之下深爲軫惻自應重加葺治增設龕位俾臻完備再我朝開創之初睿親王以我師取遼東時明之君臣惑於形家謬說將房山縣金陵拆毀是以邇時睿親王亦將定陵享殿撤去停其祭祀今應一體修復所有定陵享殿著仍行修建春秋祀事如故又明世宗永陵前因尹嘉銓條奏等情（見日下舊聞）將其祭祀裁撤但前明之亡不亡於崇禎而亡於萬歷天啓是以於歷代帝王廟中撤其位祀而陵寢仍前致祭世宗尙不致如萬歷天啓之昏庸失德其陵寢自應照常一體致祭以昭大公此次修復諸明陵殿宇等工即費至百萬帑金亦所不靳所有此項工程著派尙書劉墉德保金簡侍郎曹文埴德成董率經理務期完固工成後飭該地方官隨時稽查小心防護嚴禁樵蘇用副朕隆禮勝國至意（乾隆五十年）

前清高宗純皇帝因重修明陵工竣復行禁止樵採簡派稽查

順治年間因明陵附近居民於陵傍樵採曾奉諭旨禁止並添設陵戶看守數十年來稽查不力兼被風雨摧殘以致殿宇損壞牆垣欹側前年朕親臨奠醴緬懷前蹟是用惻然因特發帑金揀派大臣監督將各陵重加修葺茲屆工竣朕便道親臨視殿宇煥然松楸如舊第恐閱時既久地方官查禁不力復不免有私行樵採及殿宇牆垣間被風雨損壞等事嗣後應交直隸總督責成昌平霸昌道（今已裁撤）就近專管稽查仍於每年十月著工部屆期奏請派該部堂官一員前往查勘如有殿宇牆垣樹株傷損情事惟該管道員是問以示朕加禮勝朝保護舊陵之至意（乾隆五十一年）

前清仁宗睿皇帝因閱明陵復申例禁

本日朕親至明成祖長陵醑奠並遣大臣分詣諸陵行禮憑眺山林彌深殷鑒敬念

皇考高宗純皇帝特諭重修明帝諸陵明榑享殿規制煥然嚴禁樵蘇松楸無恙茲朕鑿輅親臨再申例禁著該地方官以時飭令守陵人戶敬司灑掃並嚴禁砍伐樹木侵佔周垣附近地界及明堂正路永遠遵奉毋得懈弛以副朕恪守前謨培護勝國陵寢至意（嘉慶九年）

前清高宗純皇帝北幸昌平謁明陵八韻（乾隆五十年春）

望鐘阜之松楸巡塗必詣指昌平之表碣蹕路茲臨維十三陵之兆域相依經百餘年而德怨久泯况得之賊手立統正而仇復前朝且優以侯封布澤深而仁欽

祖德雖採樵禁於令甲而閱歲或致頽初值此親瞻惻然瞻念忍聽丹墀粉剝無繼體以銷沉依然隧闕堂深發重帑而賁飾彼何示人以不廣毀及金源我惟懷天之難謹假茲殷鑒擗八韻而成斯詩什等百世則具在鑒評

驅除本是藉餘閏表正由來超古今廣運親承一統大勝朝消隔百年深山
陵念以北鄰近車駕因之此日臨德怨久哉幻時世興亡昭矣惕予心雖云
樵採勤禁護亦惜殿堂逮圯沉應悟有成卽無廢當忘彼慙毀其金地官漫
斲費帑項冬部爰教飾鼎林卽故寢園是明監靡常 天命懷難諶

又哀明陵三十韻（乾隆五十五年夏）

北過清河橋遙見天壽山勝朝十二陵錯落兆其間太行龍脉西南來金堂
玉戶中間開左環右拱實佳城千峯後護高崔巍昌平（縣名）黃土（山名）
誠福地永樂曾以親臨視英雄具眼自非常豈待王賢廖均陳其藝或曰十
三氣數盡朱明祚以此爲準是蓋形家惑世言承天造命惟君允後嗣果能
繼祖烈朱氏宗社那遽絕君昏國事付韶瑄瞻烏久矣於誰瞥向聞頽廢應
修治工鉅無敢發其辭湯山駐蹕一往閱勝朝舊蹟當護持稜恩（殿名）制

肖皇極（殿名）建雖存已剝丹青爛宣德曾頌袞奢麗此而非奢奢孰見石
城明樓依然巍三杯守醑拜如儀明臣屢永衣冠闕底須重訂傳訊詞棟柱
如舊椽木朽簷瓦落地狐兔走以其初建工力觀未修豈數百年久永陵制
乃如長陵定陵效之侈有增忘其前世歎開創徒計身後晉堪輕長陵一碑
功德記餘皆有碑而無字秦山以後唐乾陵此典何出竟爲例思陵乃就妃
園葬趙一桂曾記開壙香殿三間復九間寢牀供案皆雄壯一妃之費已如
此餘諸帝者可知矣即今雖爲禁樵蘇松柏鬱葱屋傾圯屋圯猶可龕帳無
並其神主全失諸尺木植幾亦盜去汝祖獨非厥民乎不忍再視命修葺悚
然悵然欲垂泣此意弗更再三言讀召誥文示詳悉

過清河望明陵各題句（乾隆丁未季春）

宸章

六度南巡洪武必瞻廟貌近茲北眺永樂一奠椒漿定鼎燕京排衆議而具

卓識秘衣天壽示百載更有深謀故異代爲之護持飾新葺舊爰命水部之臣發價雇工不惜地官之帑逮去冬乃歲事視季春以落成蓋自上澣廻鑾遇閒每以成什逮茲避暑啓蹕竣詠遂以登篇

望成祖長陵題句

唐宗明祖弗相殊唐則失茲明有需事價率多咎齊秦禍根應識始三吾遷京違議辭江國卜鼎深謀定帝都宏制倣成奉天殿終於無用若爲乎

唐太宗明成祖皆英雄也其處家門事大同而小異者蓋因唐高祖無能爲建成元吉之禍又逼故太宗不得不倒行而逆施若明太祖乃有能爲者故成祖畏而弗敢即動以待後日然使太祖弗聽劉三吾之言立成祖爲太子亦可無靖難之禍矣此蓋二帝之所遇不同有幸有不幸耳

望仁宗獻陵題句

獻陵近在長陵右十二陵中儉約首朱氏之君實巨擘惜乎一載位不久使其臨莅歷多年漢文宋仁不足醜但盡子職不知他毓德者應爲法守然而其時亦殆哉楊溥黃淮下獄因讒口是則立儲可行哉計久長應酌臧否

（楊黃事載明史）

望宣宗景陵題句

長陵頌淳樸其言未必允景陵實淳樸觀之美德蘊英祖有肖孫儀型服以近修政平強濼繩武業弗隕椽人俾通文涓涓誠未諱陳祚郭循怒下獄則逞一時憤殿壁繪爾風信知民務本不失爲賢君後世乖厥準

望英宗裕陵題句

親征開釁聽權閹幸得還朝南內潛不以播遷咎王振翻因復辟恨于謙便些小善何足紀從婦寺凶豈待占景帝易儲信貪位闖牆尺布竟招嫌（英

宗及景泰事均見明史。

望憲宗茂陵題句

口宣經義具文徒（載明史）劉定之仍請弗須遂使情如千里隔相看默乃
一言無雪寃幹盡則誠善蠲賦省刑不可誣增廠乘時恣傷竈早成家法與
亡俱（事載通鑑輯覽）

望孝宗泰陵題句

雖常有善政然亦任中涓積重原難返去奢果是賢一倉萬石備實鮮博名
傳享年只三十六多忘無逸篇

明史載諸帝太祖成祖而外治績有可稱者仁宗宣宗孝宗而已然孝宗
所處與仁宣異仁宣之際國勢初張綱紀修立二宗蒙業兢兢易稱令主
至成化以後天下襲太平數十年矣晏安久則不期怠而自怠豐亨積則

不期奢而自奢孝宗獨能恭儉有制勤政愛民庶幾知保泰持盈之道者獨不免信佞中官假之事柄東廠之恣肇端於此涓涓不塞谷亦難辭然其設施未終年僅三十有六有足惜爾明自太祖成祖以來踐祚久而享年永著概不多見其自弘治以前如洪熙成化僅閱四旬宣德正統甫踰三十其在弘治以後正德隆慶亦僅踰三十神宗雖踰五旬終不免怠荒失德至天啓弱冠而殂享年更促可見耽樂是從罔或克壽理誠不爽無逸之書以嚴恭貞畏爲祈天永命之本而以不知稼穡艱難不知小人之依爲戒統觀有明諸帝年祚修短足爲明徵因論弘治之事附申論之以昭炯戒云

望武宗康陵題句

連疏請誅闔驚泣忘食矣尙可諉年少及壯益堪鄙惡事無弗爲實厭數

(上聲) 僕指莊宗李天下成帝張公子較彼尤甚焉不忘更何俟而竟未即亡殊難究此理向著讀召誥約畧明其旨

按天之視君猶父之視子父於子無不亟其愛子於父當無不亟其敬然及其一再失敬猶必訓誨之至怙終弗悛則亦弗愛之而已如明永樂之篡位大行誅戮應亡而弗亡正統之北狩應亡而亦弗亡正德之荒淫失德應亡而尚弗亡此非慈父之遺其罪而仍有所顧惜之意乎必至萬歷怠政天啓童騃崇禎有猜忌之失無恢復之能而後亡之天意昭昭可監予嘗以爲有明二百七十餘年傳世十六非昊蒼慈貺不及此可不慎乎可不懼乎茲因望康陵題句有鑒於難諶靡常之戒復申論之

望世宗永陵題句

但知私孝忘公議瓊華因開僥倖門既以修齋習黃老那更(平聲)戀世修

陵園去奸匪聽忠臣諫斥佞乃因方士言白兔仙桃誇上瑞較於漢武倍爲昏

按明史嘉靖欲推崇興獻本屬人子至情假令集議之初即定爲本生尊以帝號使其報本之意既申或可隱全大義乃一時廷臣紛紛聚訟必執濮議相持遂使張璁桂萼等阿諛逢迎激成過舉予向作濮議辨以局外而觀局中爲之權衡斟酌期合夫天理人情之正俾萬世本支承統者有所折衷因向題永陵復申論之

望穆宗昭陵題句

隆慶堪稱明帝良石星猶諫廢朝章語緣遏抑內臣故廷杖受譽非受殃

通鑑輯覽載隆慶二年之事

望神宗定陵題句

明帝鮮善政然或一二有茲今論足陵乃無一可取少時擅居正任爲弗可
否長懶見廷臣股肱隔元首以私弗立儲爭產益可醜賢黨奸黨混致此誰
之咎蓋天厭明德縱之歷年久明亡定於斯戒萬世不朽

望光宗慶陵題句

記稱國將亡則必有妖孽三案萃泰昌遇時遭決裂踐祚未及月紀年半載
缺史贊潛德彰蓋勉爲之說

按泰昌三案之事載明史

望熹宗德陵題句

明之天啓秦二世昏闇大都相同爾所以趙高及忠賢其用奸亦相比擬然
二世猶稍自肆天啓諸事不由己俾之斧鑿恣兒戲乳母竟至戕妻子斯固
可憐亦可憐明祚安得不亡矣劊斷金陵爲厭勝亦蓋由於奸宦耳睿王報

德以直爲聞其明樓被焚毀即今重修復舊觀以德弗以直尤美

按史鑑均載明至神宗末年綱紀廢壞極矣重以天啓昏懦婦寺竊權濫賞淫刑忠良慘禍不可殫述旋將房山金代諸陵拆毀斷地脉又建關廟於其地以爲厭勝實屬乖謬然其時天啓童騃國是久置不問殆亦魏忠賢輩猖狂恣肆任意妄行不必歸咎於天啓也迨我帥入定燕京睿親王以尼堪外蘭之變焚毀德陵明樓享殿夫修怨復仇臣子之通義在睿親王自當以直報怨非爲己甚但今閱百數十年德怨久泯昨因修復明陵仍命將天啓德陵明樓殿廡一律興造俾還舊觀此則以德報怨自古所無蓋在我寧失之過厚耳

望懷宗思陵題句

大廈支寧一木材等爲明更濟多猜勤勞甚亦徒虛耳社稷殉之誠壯哉就

寢飾終經早備起樓設主更重培得非其手報從厚萬古皇清德量恢

前清世祖定鼎命以禮改葬即田妃園寢建陵並親詣昌平致祭祝以祭文加謚莊烈而一切明樓享殿之制未大備今重爲修葺悉如別陵並普立神牌木主供奉以妥享祀焉

按明史崇禎承神熹之後大勢已傾淪胥莫挽即位之初尙有志於明作有爲而燭理不明徒事等察加以多疑偏執往往於瑣屑處推尋小過而巨惡轉任其朦混嘗謂其無恢復之能有猜忌之實非刻論也故在位十有七年憂勤惕勵無裨阽危有足惜者卒之身殉社稷愨烈可稱與自古亡國之君有間本朝得統正大光明取非其手既爲雪恥復仇而飾終典禮復訪其後裔至今世襲侯封春秋命其祀陵皆自古施仁勝國者所未之有也茲因睇望各陵各爲系什並尙論當年興廢之由亦以示萬世殷

鑒云爾

前清仁宗睿皇帝謁明陵八韻（嘉慶九年季春）

請兵雪恨逐流賊正位中華大統彰代謝應

天泯德怨敬勤御極鑒興亡封侯布惠

祖恩浩發帑修陵

考澤洋巖禁採樵仍守護重新闕殿免殘荒至今未絕春秋祀稽古孰存典
籍詳鍾阜曾瞻龍虎踞壽山始覩檜松蒼漫論形勝皆陳蹟益感廢成飭大
防醜奠階前衷倍凜求安圖治念苞桑

6

721025

